

मार्निंग डोगरी न्यूज़ बुलेटिन, समें. 09-20 Hrs

<><><><><><>

## Headlines

- 18मीं लोकसभा लेई करोआए गेदे चुनाएं दी मतगणना शुरू होई गेदी ऐ। मुख्य चुनां आयुक्त राजीव कुमार होरें आखेआ जे लोकसभा चुनाएं च 64 करोड़ 20 लख मतदाताएं दी शिरकत नै इस विश्व रिकार्ड कायम कीता ऐ।
- जम्मू ते उधमपुर लोकसभा सीटें लेई मतगणना त्रुं सतहें दी सुरक्षा-बवस्था हेठ शुरू होई।
- पुलवामा टाकरे च मरोने आले दऊं आतंकवादिएं चा इक लश्करे-तैयबा दा इक मुख्य कमांडर बी शामिल ऐ।
- मुख्य सचिव अटल डुल्लू होरें श्री अमरनाथ जी दी यात्रा 2024 लेई कीते गेदे इंतजामें दा लेआ जायजा। यात्रा शुरू होने शा पैहले सहूलतें गी बधाने ते बकाया पेदे कम्में गी पूरा करने दे दित्ते निर्देश।

<><><><><><>

## Election Commissioner Conuting

लोकसभा चुनां 2024 दे वोटें दी गिनतरी बडलै 8 बजे शुरू होइ चुकी दी ऐ। एहदे कन्नो-कन्नी आंध्रप्रदेश ते ओडिशा विधानसभा चुनां ते किश राज्यें दे विधानसभा उपचुनां दी गिनतरी बी अज्ज गै होआ करदी ऐ। वोटें दी गिनतरी कराने दिएं तैआरिं बारे कल इक संवाददाता सम्मेलन च जानकारी दिंदे होई मुख्य निर्वाचन आयुक्त राजीव कुमार होरें दस्सेआ जे मुख्य भरै च वोट दी गिनतरी लेई कोई साढे 10 लख केन्द्र बनाए गेदे न ते इस पूरी प्रक्रिया गी पूरी चाल्ली रमानदार, सुरक्षत ते बवस्था आले ढंगै नै तोड़ चाढ़ने लेई लोड़चदे सब्बै बंदोबस्त करी लैते गेदे न ते पूरी प्रक्रिया दी बड़ी नेड़े दा निगरानी दे प्रबंध कीते गेदे न। गिनतरी आले हर केन्द्र च 14-14 टेबलें पर वोटें दी गिनतरी दे प्रबंधन कीते गेदे न ते इस पूरी प्रक्रिया पर तक्क रखने लेई विशेष निगराने ते माइक्रो निबरानें दी तैनाती कीती गेदी ऐ। लोकसभ दे 543 मिंबरें दे चुनां लेई आम चुनां 19 अप्रैल गी शुरू होइयै 7में गेड़े च पैहली जून गी खत्म होए हे। गिनतरी आले केन्द्रें ते इंदे आले दुआले दे इलाकें च त्रुं घेरे आली सुरक्षा प्रबंध कीते गेदे न।

शुरूआती रूझान औना शुरू होई गेदे न। मतगणना आली प्रक्रिया गी रमानदारी कन्नै करोआने लेई त्रै सतह दे सुरक्षा बंदोबस्त कीते गेदे न। मतगणना दे रूझान ते नतीजे चुनां आयोग दी वैबसाइट ते वोटर हैल्पलाईन पर उपलब्ध होंगन।

<><><><><><><>

## CEO

मुख्य चुनां आयुक्त राजीव कुमार होरें आखेआ ऐ जे भारत दे लोके 64 करोड़ 20 लख कोला मती गिनतरी च वोट पाइयै जेहड़ा विश्व रिकार्ड बनाया ऐ, एह गिनतरी सब्बने जी-7 मुख्यें जिंदे च अमरीका, यू.के., फ्रांस, जर्मनी, इटली, जपान ते कनाडा शामिल न, दे कोला मतदाताएं दी गिनतरी कोला बी मती ऐ। जम्मू कश्मीर च विधानसभा चुनां करोआने बारे पुच्छे गेदे इक सुआलै दे परते च उनें आखेआ जे चुनां आयोग तौले गै जम्मू कश्मीर च बी चुनां प्रक्रिया शुरू करी देग।

<><><><><><><>

## J&K Counting

जम्मू कश्मीर च 4-उधमपुर-कठुआ ते 5-जम्मू-रियासी लोकसभा हल्के लेई पूरे मुख्यै दे कन्नो-कन्नी वोटें दी गिनतरी शुरू होई गेदी ऐ। जम्मू ते कठुआ जिलें च मतगणना केन्द्रें दे आले दुआले त्रऊं सतहें आली सुरक्षा बवस्था सरगर्म ऐ। इनें दौनें पार्लिमानी हल्के दे 23 लख 94 जहार मतदाता 34एं मेदवारें दे भागें दा फैसला करगन। जिंदे च बीजेपी दे वरिष्ठ नेता ते केन्द्री मंत्री जितेन्द्र सिंह, जम्मू थमां वर्तमान सांसद जुगल किशोर शर्मा ते कांग्रेस दे साबका मंत्री चौधरी लाल सिंह ते रमण भल्ला शामिल न। ताजा जानकारी कन्नै जम्मू थमां साढ़े संवाददाता अंकुश शर्मा। डोगरी खबरें कन्नै लाईव जुड़े न जी.अंकुश शर्मा.....

मतगणना केन्द्रें च कनेया रौंह ऐ इसलै?

कोई रूझान सामने आवा'रदे न।

तुंदा धन्नबाद अंकुश जी। तोआई कठुआ च उधमपुर-कठुआ लोकसभा पार्लिमानी नशिस्तें लेई वोटें दी गिनतरी आले केन्द्र च त्रऊं-सतहें दे सुरक्षा इंतजाम कीते गेदे न। अंतर्राष्ट्रीय बन्ने ते अंतर-जिला चेक प्वाइंटें पर बाद्ध सुरक्षा बवस्था दे इंतजाम कीते गेदे न तां जे समाज दुश्मन ते राष्ट्र दुश्मन गतिविधिएं पर ताड़ रक्खियै उनेंगी रोकेआ जाई सकै। उधमपुर कठुआ लोकसभा सीटें लेई मतगणना केन्द्र सरकारी डिग्री कालेज कठुआ च बनाया गेदा ऐ। जित्थें बहु-सतीय सुरक्षा-बवस्था ते 24एं सीसीटीवी निगरानी दे पुख्ता प्रबंध कीते गेदे न। कठुआ थमां संवाददाता प्रदीप लाईव जुड़े दे न।

जी प्रदीप...मतगणना केन्द्र दे अहाते च ते गिर्दोनवाह च सुरक्षा प्रबंधें बारे साढ़े श्रोताएं गी जानकारी देना ते मतगणना दे कोई रूझान ऐ। बाहरें सियासी पार्टिं दे कारकुनें च कैसा जोष दिक्खने गी लब्भा'रदा ऐ। शक्रिया प्रदीप।

<><><><><><><>

## DM Jammu

सार्वजनिक अमन-शांति ते कनून बवस्था बनाई रखने लेई जिला मैजिस्ट्रेट जम्मू सचिन कुमार वैश्य होरें उनें गी हासल इख्तियारें दा इस्तेमाल करदे होई मतगणना केन्द्रें दे गिर्दोनवाह च दंड-प्रक्रिया संहिता सीआरपीसी दी दफा 144 लाई दित्ती ऐ। अज्ज जारी कीते गेदे इक हुकमै मूजब लोकसभा 2024 लेई करोआए गेदे आम चुनांएं गी मतगणना लेई 4 जून 2024 दा दिन तैह कीता गेदा ऐ। इस दरान कनून बवस्था ते सार्वजनिक अमन-शांति कन्नै सरबंधत समस्याएं दा खदशा बने दा रौहदा ऐ जिसी ध्यानै च रखदे होई में सचिन कुमार वैश्य, जिला मैजिस्ट्रेट जम्मू सीआरपीसी\_दी दफा 144 तैहत हासल इख्तियारें दा इस्तेमाल करदे होई मतगणना केन्द्रें दे अहाते च कुसै बी किस्म दे जलूस जां नारेबाजी पर प्रतिबंध दे हुकम दिन्नां। मतगणना केन्द्रें दे अहातें च सार्वजनिक आडियो सिस्टम, लाउडस्पीकर लाने जां कुसै सियासी पार्टी जां मेदवार आस्सेआ समारोह मनाने पर रोक लाई गेदी ऐ।

<><><><><><><>

## Encounter

पुलवामा जिले च सुरक्षा बलें इक टाकरे दरान आतंकवादी संगठन लश्करे तैयबा दे 2 आतंकवादिं गी मारी मकाया ऐ। आतंकवाद-रोधी अभियान पुलवामा जिले दे निहामा इलाके च चलाया गेआ हा। इलाके च आतंकवादिं दी मजूदगी बारे थ्होई दी टकोहदी सूह पर कारवाई करदे होई सुरक्षा बलें इलाकें दी घेराबंदी करियै तपाशी अभियान शुरू करी दित्ता, दौनें बश्कार गोलीबारी होई। आतंकवादी जिस घर च छप्पे दे हे, उस घरै च अग्ग लग्गी गई। आतंकवादिं दियां लोथां बरामद होने मगरा अभियान गी रोकी दित्ता गेआ। मारेआ गेदा इक आतंकवादी रियाज दास ऐ जेहड़ा 2014 च लश्करे तैयबा च शामिल होई गेआ हा। पाकिस्तानी आतंकवादिं अबु दुजाना ते अबु इसमायल कन्नै बी कम्म कीते दा ऐ। आपमं बनी बैठे दा एह कमांडर केइं आतंकवादी गतिविधिं च शामिल रेआ। चऊं हफते च दक्खनी कश्मीर च चलाया गेदा एह दुआ आतंकवादी-रोधी अभियान ऐ।

<><><><><><><>

## Chief Secretary

मुख्य सचिव अटल डुल्लू होरें श्री अमरनाथ जी श्राईन बोर्ड दी उप-कमेटी दी अध्यक्षता कीती। बैठक च शिविल प्रशासन ते पुलस दे वरिष्ठ अधिकारिएं हिस्सा लैता। बैठक दा मकसद औंदी श्री अमरनाथ यात्रा गी सुचारू ते रमानदारी आले ढंगै सिर करना जकीनी बनाना हा। उनें श्रद्धालुएं दी आओजाई जम्मू-श्रीनगर राष्ट्रीय जरनैली शिड़क पर सुचारू ते सुरक्षत बनाने लेई सुविधाएं ते होर दुए तौर-तरीके दा बी जायजा लैता। उनें मुत्तलका लोकें गी हिदायत कीती जे ओह एहदे लेई लोड़चदे बंदोबस्त करी लैन। 29 जून थमां शुरू होने आली एह यात्रा 19 अगस्त तगर जारी रौहग। इस दरान एह जानकारी बी दित्ती गई जे यात्रा लेई पंजीकरण 15 अप्रैल थमां बैंक राएं ऑफलाइन ते ऑनलाइन दौनें सरिस्ते राएं शुरू होई गेआ ऐ। हर यात्री गी आरएफआईडी करी दित्ता जाग। आरएफआईडी कार्ड ई-केवाईसी होने परेंत गै दित्ता जाग। मुख्य सचिव होर सारे बकाया पेदे कम्में गी पूरा करने लेई गलाया तां जे सलाना यात्रा रमानदारी ते सुचारू ढंगै सिर सम्पन्न होई सकै।

<><><><><><>

## ADC Drug Udhampur

उधमपुर दे अतिरिक्त डिप्टी कमीशनर जोगिन्द्र सिंह होरें इक बैठक लाइयै उधमपुर च जिला रैड क्रस सोसायटी आस्सेआ नशा मुक्ति केन्द्र कायम करने बारे चर्चा कीती। इस दरान व्यापक बचार बमर्श कीता गेआ। बैठक च ढांचागत जरूरतें, जरूरी सुविधा-सहूलतां ते होर दुए इंतजामें पर चर्चा होई उधमपुर दे तैहसीलदार होरें गी लोड़चदी थाहर दी पंछान करने लेई गलाया गेआ। एडीसी होरें गैर सरकारी संगठनें कन्नै तालमेल पर जोर पाया तां जे नशा मुक्ति केन्द्र रमानदारी कन्नै चली सकै।

<><><><><><>

## JKEDI-Ramban

जम्मू कश्मीर उद्यमियता विकास सरबंधी इदारे दे निदेशक राजेन्द्र कुमार शर्मा होर रामबन च 10 दिनें दे उद्यमियता विकास प्रोग्राम दा ई-सरिस्ते राएं उद्घाटन कीता। इस कार्यक्रम दा सरिस्ता मिशन यूथ तैहत होआ ऐ। उद्घाटन मगरा प्रतिभागिएं गी संबोधत करदे होई निदेशक होरें उद्यमियता राएं महिलाएं गी सशक्त करने पर जोर पाया। महिलाएं च हुनर विकास करियै ते उनेंगी संसाधन उपलब्ध करोआइयै उद्योग जगत च सफल कीता जाई सकदा ऐ। 10 रोजा इस कार्यक्रम लेई 28 आवेदकें पंजीकरण कीता।

<><><><><><>